

Nos Amore pio ducti, humilia non excelsa ambimus, & cum in his caducis nusquam detur absoluta veritas, aliorum errores cum nostris mittere, nec eos attingere instituimus.

Laboriosum quidem imposui Filio opus, meâ tamen, ubi ferendo oneri impares erant humeri, aliquali, (quæ tamen non de nihilo fuit) operâ adjuto, quod merus quidem labor, non ingenium, multis apparebit. Sed quid absque labore unquam acquiritur? Labor omne, quod ingenium habet, efficere, & utramque paginam absolvere videtur. Præterea juvenilis ætas, laboribus aptior, in his, & similibus exercenda, ne otio, vitiis obnoxia, diffluat.

Opus verò hoc necessariò edendum existimavi, in gratiam eorum, qui vel Botanices amore accensi, vel Horticulturæ studio ducti, genuina & per tot Secula hæctenus usitata Plantarum Nomina, quæ vix in Lexicis vel amplissimis extarent, evolvere, rectè pronunciare, scribere, eorum origines inquirere, herbarum virtutes eruere & ad plures usus applicare animum inducunt. Nam licet id viri Eruditione eminentes possidere videantur; illi tamen, qui artem botanicam inchoant, & absolvere fatagunt, imprimis Hortulani illi, (de eruditis non sunt verba facienda) qui non tam animum, quàm humum excolere, non tam literas, quàm areolas exarare didicerunt, & tamen ob incondita & barbara sæpius prolata Plantarum Nomina, (quibus & similibus vocum barbarismis vel totus inundatur terrarum orbis, & natus cujusvis Linguae nitor corrumpitur,) præ cæteris aliquid sapere volunt, hoc vel simili Indice carere minimè possunt.

Continet autem hic Onomasticus Index Nomina Plantarum, diversis Populorum Linguis, (quotquot nempe & quantum ex Auctori- bus extrahi licuit) conscripta, cum Locis Auctorum genuinis adjunctis, quò illum omnis ferè Europæa gens, Literis Latinis, Græcis, & Germanicis imbuta, ad usus suos trahere possit. Nam pro Idiomaticum diversitate, & qui in Linguis suis scripserunt, ex *Græcis veteribus* adduxi & pro Auctoritate allegavi Medicorum Coriphæum *Hippocratem*, qui licet de Re Herbaria ex professo non scripserit, Nominum tamen Herbarum, quæ longò antè seculò in usu fuerunt, meminit: deinde *Theophrastum Eresium*, & *Dioscoridem Anazarbæum*, Botanographorum Principes. Rarò autem *Aristotelem*, *Atheneum*, *Nicandrum*, *Ægine- tam*, *Galenum* & alios recentiores. Ex *Latinis veteribus*, *Cajum Plinium secundum*: rarò *Celsum*, *Catonem*, *Varronem*, *Apulejum*, *Petro- nium*, *Palladium*, *Crescentium*, &c. Ex *Recentioribus* verò Clarissimos *Bauhinos*, *Casparum* nempe, & *Johannem* ejus fratrem: ex quibus Herbarum Species & Differentias, quotquot extiterunt, cum aliorum, & meis observatis, singulari studio extraxi, & cuilibet Generi subjunxi:

Fabi-